

Na osnovu člana 25. i člana 40. Statuta Vanjskotrgovinske komore Bosne i Hercegovine („Sl. glasnik BiH“, broj: 52/14 i 19/18), Upravni odbor Vanjskotrgovinske komore Bosne i Hercegovine, na sjednici održanoj 28. 3. 2023. godine, donio je

PRAVILNIK O IZMJENAMA I DOPUNAMA PRAVILNIKA O ORGANIZACIJI I RADU ARBITRAŽNOG SUDA

Član 1.

U Pravilniku o organizaciji i radu Arbitražnog suda, broj: VTK-542-3/03 od 17. 6. 2003. godine („Sl. glasnik BiH“, broj: 39/03), dodaje se novi član 1. koji glasi: „Pravilnikom o organizaciji i radu Arbitražnog suda pri Vanjskotrgovinskoj komori Bosne i Hercegovine uređuje se nadležnost Arbitražnog suda, organizacija, imenovanje arbitara, postupak, troškovi, kao i druga pitanja koja se odnose na rad Arbitražnog suda.“

Član 2.

Dosadašnji član 1. postaje član 1a., koji se mijenja i glasi:

„Arbitražni sud pri Vanjskotrgovinskoj komori Bosne i Hercegovine (u daljnjem tekstu: Arbitražna) je samostalan sud za arbitražno rješavanje sporova.

Sjedište Arbitražne je u Sarajevu, Ul. Branislava Đurđeva 10.

Arbitražna je nadležna za rješavanje sporova koji ispunjavaju sljedeće uvjete:

1. da se radi o trgovačkom sporu u kojem stranke mogu slobodno disponirati predmetom spora,
2. da za tu vrstu spora nije predviđena isključiva nadležnost redovnog suda,
3. da su se stranke sporazumjele o nadležnosti Arbitražne.

U sporovima navedenim u stavu 3. ovog člana Arbitražna može, na zahtjev jedne ili obje stranke, da posreduje radi mirenja.”

Član 3.

Član 3. mijenja se i glasi:

„Arbitražna, kao samostalan sud, ima predsjednika, Predsjedništvo, arbitražna vijeća, arbitre pojedince i sekretara Arbitražne.

Predsjedništvo Arbitražne sastoji se od tri člana, pri čemu je svaki član pripadnik jednog od tri konstitutivna naroda u BiH.

Predsjedništvo se imenuje na mandatni period od četiri godine, s tim da članovi mogu biti ponovo imenovani.

Jedan od članova Predsjedništva je predsjednik Arbitražne, sa mandatom na toj funkciji od šesnaest mjeseci. Odlukom o imenovanju utvrđuje se redoslijed i automatska rotacija na funkciji predsjednika Arbitražne.

Predsjednika i dva zamjenika predsjednika Arbitražne imenuje organ predsjednika i dva potpredsjednika Vanjskotrgovinske komore BiH (u daljnjem tekstu: Komora BiH).

Predsjedništvo vrši nadzor nad primjenom Pravilnika, prati i razmatra praksu rješavanja sporova i vrši druge poslove za koje je nadležno po Pravilniku.

Predsjedništvo radi na sjednicama i odluke iz svoje nadležnosti u pravilu donosi konsenzusom. Ako se o pojedinom pitanju ne postigne konsenzus, donesenom se smatra ona odluka za koju je glasao predsjednik i jedan njegov zamjenik.

Predsjednik predstavlja Arbitražnu i organizira njen rad, predsjedava sjednicama Predsjedništva i vrši druge poslove predviđene Pravilnikom.

Predsjednik Arbitražne u njegovoj odsutnosti mijenja član Predsjedništva koji u narednom šesnaestomjesečnom periodu preuzima predsjedavanje Arbitražom (prvi zamjenik).

Predsjednik i zamjenici predsjednika Arbitraže za vrijeme svog mandata ne mogu obavljati poslove arbitra.

Predsjedništvo Arbitraže donosi poslovnik o svome radu.

Predsjedništvo odlučuje o imenovanju arbitra pojedinca, članova vijeća i o izuzeću arbitra pojedinca ili članova vijeća.“

Član 4.

Član 4. mijenja se i glasi:

„Stručno-administrativne poslove za potrebe Arbitraže obavlja sekretar Arbitraže kojeg postavlja predsjednik i dva potpredsjednika Komore BiH.

Sekretar Arbitraže je zaposlenik Uprave stručnih poslova Komore BiH.

Opći nadzor nad administrativnim i materijalnim poslovanjem Arbitraže vrši Komora BiH te osigurava materijalna sredstva za rad i vršenje njene funkcije.”

Član 5.

U stavu 1. člana 6. riječi: „iz člana 1. stav 3. ovog pravilnika“ zamjenjuju se riječima „iz člana 1a. stav 3. ovog pravilnika“.

Član 6.

U stavu 1. člana 11. riječi: „iz člana 1. stav 3. ovog pravilnika“ zamjenjuju se riječima „iz člana 1a. stav 3. ovog pravilnika“.

Član 7.

U stavu 1. člana 12. ispred riječi: „zamjenik predsjednika Arbitraže“, dodaje se riječ „prvi“.

Član 8.

Član 13. mijenja se i glasi:

„Ako Komisija iz prethodnog člana utvrdi da u ispravama koje je tužitelj podnio ne postoji arbitražni ugovor, sekretar Arbitraže poziva tuženog da se u roku od 15 dana od dana prijema poziva izjasni da li prihvata nadležnost Arbitraže.

Ako tuženi ne odgovori u ostavljenom roku ili odbije prihvatiti nadležnost, sekretar Arbitraže obavještava tužitelja da se arbitraža ne može izvršiti.

U slučaju iz prethodnog stava, sekretar Arbitraže određuje iznos naknade prouzrokovanih troškova, odnosno iznos koji će biti vraćen tužitelju na ime uplaćenih administrativnih troškova postupka.”

Član 9.

U stavu 1. člana 15. ispred riječi: „zamjenik predsjednika Arbitraže“, dodaje se riječ „prvi“.

Član 10.

U članu 16. iza stava 3. dodaje se novi stav 4. koji glasi: „Ako se usvoji prigovor nadležnosti, arbitraža će se oglasiti nenadležnom, posebnim rješenjem.“

Član 11.

Stav 1. tačka 1. člana 18. mijenja se i glasi: „ime, zanimanje i stalno prebivalište, odnosno naziv, predmet poslovanja i sjedište obiju stranaka, te adresu, uključujući i elektronsku, za dostavljanje pismena;“.

Stav 4. člana 18. mijenja se i glasi: „Tužba sa priložima se, nakon uplate administrativnih troškova postupka, dostavlja tuženoj stranci na odgovor i istovremeno se navodi u koliko primjeraka treba dostaviti odgovor na tužbu i priloge.“

Član 12.

U stavu 2. člana 19. iza riječi „od“ dodaje se riječ „roka“.

U stavu 3. člana 19. iza riječi „dokumentima“ briše se tačka, stavlja zarez i dodaje tekst: „iznijeti eventualne prigovore na nadležnost, kao i prijedlog za imenovanje arbitra.“

Član 13.

U članu 22. se iza stava 1. dodaje novi stav 2. koji glasi: „Arbitar pojedinac, odnosno arbitražno vijeće može svojim rješenjem utvrditi da se dostavljanje poziva i drugih pismena u toku postupka vrši putem e-maila (u PDF formatu), uz povratnu potvrdu o prijemu.“
Dosadašnji stavovi 2. i 3. postaju stavovi 3. i 4.

Član 14.

Iza člana 23. dodaje se novi član 23a. koji glasi:
„Zahtjev za postavljenje na Listu/Liste arbitara dostavlja se putem pošte na adresu: Vanjskotrgovinska komora BiH, Branislava Đurđeva 10, 71 000 Sarajevo.
Uz zahtjev je potrebno dostaviti: biografiju, diplome, certifikate i uvjerenje o nekažnjavanju.“

Član 15.

U stavu 1. člana 24. riječi: „stav 2. ovog pravilnika“, zamjenjuju se riječima: „stav 3. ovog pravilnika“.

Član 16.

Iza člana 28. dodaje se novi član 28a. koji glasi:
„Lice koje treba biti arbitar daje pisanu izjavu o prihvatanju dužnosti, raspoloživosti te nezavisnosti i nepristrasnosti, čiji obrazac je sastavni dio ovog pravilnika.
Pisana izjava iz stava 1. ovog člana se dostavlja strankama u postupku, putem sekretara Arbitraže.“

Član 17.

U članu 31. iza stava 1. dodaje se novi stav 2. koji glasi: „Arbitar čije se izuzeće traži dužan je predsjedniku Arbitraže dostaviti svoje izjašnjenje na zahtjev za izuzeće u roku od 15 dana od dana prijema takvog zahtjeva.“
U stavu 2. člana 31. riječ „potpredsjednik“ zamjenjuje se riječima: „zamjenici predsjednika.“
Dosadašnji stavovi 2. i 3. postaju stavovi 3. i 4.

Član 18.

Stav 2. člana 39. mijenja se i glasi: „Arbitri mogu naložiti strankama da osiguraju prisustvo svjedoka, ali mogu i sami uputiti poziv svjedocima.“

Član 19.

U članu 41. iza stava 3. dodaje se novi stav 4. koji glasi: „Zapisnik se može voditi i putem audiosnimka koji se, bez odlaganja, dostavlja strankama, a u dogovorenom roku sačinjava se transkript zapisnika na koji stranke daju saglasnost i potpisuju ga.“

Član 20.

U članu 43. iza stava 1. dodaje se novi stav 2. koji glasi: „Ako u Pravilima o arbitraži Komisije Ujedinjenih naroda za međunarodno trgovačko pravo (UNCITRAL) ne postoje odgovarajuće odredbe, primjenjuju se odredbe ovog pravilnika.“

Član 21.

U stavu 1. člana 46. broj „15“ zamjenjuje se brojem „30“.
Iza stava 1. dodaju se novi stavovi 2. i 3. koji glase:
„Izuzetno, u složenim stvarima, arbitar pojedinac, odnosno predsjednik arbitražnog vijeća je dužan obavijestiti predsjednika Arbitraže ukoliko postoje razlozi zbog kojih presuda ne može biti donesena u roku iz stava 1. ovog člana.“

„Predsjednik Arbitraže će, po potrebi, preduzeti mjere da se presuda što prije donese.“

Član 22.

U članu 50. iza stava 3. dodaje se novi stav 4. koji glasi: „O podnošenju zahtjeva iz prethodnog stava obavještava se suprotna stranka.“

Dosadašnji stav 4. postaje stav 5. te se mijenja i glasi: „Ispravke se vrše u pismenom obliku, posebnim rješenjem. Ispravka odluke je sastavni dio odluke.“

Član 23.

Član 52. mijenja se i glasi:

„Strankama se dostavljaju prijepisi presude koje potpisuju članovi arbitražnog vijeća, odnosno arbitar pojedinac.

Akt o dostavi prijepisa presude strankama potpisuje predsjednik Arbitraže.

Na presudu se, po zahtjevu stranke, stavlja potvrda o njenoj izvršnosti.

Potvrda izvršnosti stavlja se najranije po proteku roka od 8 dana od dana isteka roka za zahtijevanje ispravke u odluci, odnosno najranije u roku od 8 dana od dana prijema ispravke odluke.

Strankama se mogu izdati, na njihov zahtjev, naknadni prijepisi presude, ali se takvi prijepisi ne mogu izdavati trećim licima.

Po istoj proceduri postupa se i sa ispravkom odluke.“

Član 24.

U stavu 1. člana 54. riječi: „nadležni organ“ zamjenjuju se riječima: „Upravni odbor“.

Član 25.

Član 57. mijenja se i glasi: „Nagrade predsjednika i zamjenika predsjednika Arbitraže određuju, svojim rješenjem, predsjednik i dva potpredsjednika Komore BiH.“

Član 26.

Sporovi započeti prije stupanja na snagu ovog pravilnika okončat će se prema odredbama Pravilnika o organizaciji i radu Arbitražnog suda, broj: VTK-542-3/03 od 17. 6. 2003. godine („Sl. glasnik BiH“, broj: 39/03).

Član 27.

Ove izmjene i dopune Pravilnika stupaju na snagu u roku od osam dana od dana objavljivanja u Službenom glasniku Bosne i Hercegovine.

Broj: 01-2-01-2-336-2/23
Datum: 28. 3. 2023. godine

PREDSJEDNIK
UPRAVNOG ODBORA
Denis Delić